



REPUBLIKA E KOSOVËS	REPUBLIKA KOSOVA
GJYKATA SUPREME E KOSOVËS	VRHOVNI SUD KOSOVA
G.J.A-Su.A 388/2014	
DU: 16.10.2014	
PRISHTINË - PRIŠTINA	



**GJYKATA SUPREME E REPUBLIKËS SË KOSOVËS  
VRHOVNI SUD REPUBLIKE KOSOVA  
SUPREME COURT OF THE REPUBLIC OF KOSOVA**

Mbledhja e Përgjithshme e Gjykatës Supreme të Republikës së Kosovës, me gjyqtarë vendorë dhe ata nga EULEX-i, duke vodosur sipas kërkesës së gjyqtarëve nga Departamenti për Çështje Ekonomike i Gjykatës Themelore në Prishtinë, në bazë të nenit 22 të Ligjit për Gjykatat e Rregullta, më 02.10.2014, jep këtë:

**MENDIM JURIDIK**

Kompetente për të vendosur lidhur me prapsim, ankesën, parregullsi në procedurën përmbaruese, kundër vendimit mbi lejimin e përmbarimit të përmbaruesit privat, ku si palë janë paraqitur personat juridik apo shoqëritë tregtare, është Gjykata Themelore në territorin e të cilës gjendet selia e debitorit, në kuptim të nenit 5.5 të Ligjit Për Procedurën Përmbarimore dhe nenit 11.1 të Ligjit për Gjykatat.

**A r s y e t i m**

Gjykates Supreme të Kosovës i janë drejtuar me kërkesë, gjyqtarët e Gjykatës Themelore në Prishtinë, Departamenti për Çështje Ekonomike, për të dhënë mendim juridik lidhur me zbatimin e dispozitave të Ligjit të ri për procedurën përmbarimore nr. 04/L-139, dhe Ligjit për Gjykatat, që kanë të bëjnë me kompetencën për të vendosur me prapsim, ankesë, parregullsi në procedurën përmbaruese, kundër vendimeve të përmbarueseve privat dhe kundër veprimeve ekzekutive të përmbaruesve privat, në rastet kur të dy palët në procedurë janë shoqëri tregtare apo persona juridik.

Me Ligjin për procedurën përmbarimore nr. 04/L-139 i cili ka hyrë në fuqi më 01 Janar 2014, me nenin 5.5 është përcaktuar kompetenca për të vendosur çështjet që kanë të bëjnë me çdo prapsim, ankesë, parregullsi në procedurën përmbaruese. Sipas nenit 52 dhe 67 të këtij ligji, për të vendosur çështjet që kanë të bëjnë me çdo prapsim, ankesë, parregullsi në procedurën përmbaruese ose çfarëdolloj procedure kundër veprimeve të ndërmarra nga përmbaruesi privat nëse debitori është person fizik, kompetencë ka gjykata kompetente në territorin e së cilës debitori ka vendbanimin apo nëse nuk ka vendbanim në Kosovë, atëherë në territorin në të cilin ka vendqëndrimin. Nëse debitori është person juridik, kompetencë territoriale ka gjykata kompetente ku gjendet selia e debitorit.

Ligji për Gjykatat i Kosovës, me nenin 13 ka përcaktuar kompetencën e Departamentit për Çështje Ekonomike që vepron në kuadër të Gjykatës Themelore në Prishtinë, por nuk ka përcaktuar se ky Departament ka kompetencë të vendos në procedurë të përmbarimit lidhur me prapësimin e paraqitur kundër vendimeve të përmbarimit të cilat kanë të bëjnë me persona juridik apo shoqëri tregtare.

Me nenin 11 të Ligjit për Gjykatat në Kosovë, Gjykatat Themelore, janë kompetente për të gjykuar në shkallë të parë të gjitha çështjet përpos nëse me ligj parashihet ndryshe, ndërsa sipas dispozitës së nenit 16.1 të ligjit të cituar është paraparë se Departamenti i Përgjithshëm i Gjykatës Themelore gjykon në shkallë të parë të gjitha çështjet, përveç nëse kjo është në kompetencë të një Departamenti tjetër të Gjykatës Themelore.

Nga kjo rezulton se në kuptim të nenit 5.5 të Ligjit Për Procedurën Përmbarimore, Departamenti i Përgjithshëm i Gjykatës Themelore në territorin e së cilës gjendet selia e debitorit, është kompetente për të vendosur lidhur me prapësimet e debitorëve kundër vendimeve të përmbaruesve privat.

*Kryetari i Gjykatës,*

*Prof. Dr. Fezullah Hasani*

